



**Ruth Humbel, cussegliera naziunala (pcd/AG) ed Urs Schwaller, cusseglier dals chantuns (pcd/FR), han preschentà la proposta da la pcd davart la AVS dal futur.** KEYSTONE

# È mia renta AVS segirada?

## La pcd vul dapli solidaritad

DA LUCAS DEPLAZES / ANR

■ **L'AVS munta sco emprima pitga il fundament social da noss stadi. Per segirar las rentas da l'AVS pretenda la pcd dapli solidaritad ed egalitad. En vista a las midadas culturalas e socialas èn refurmas urgentas.** Savens vegnia ella confruntada cun dumondas sco: «È mia renta da l'AVS segirada? Retschaivan mes uffants in bel di la renta?» Quai ha declerà *Ruth Humbel*, cussegliera naziunala (pcd/AG), a chaschun da la conferenza da medias dad ier a Berna. L'Assicuranza per vegls e survivents (AVS) saja garantida per ils proxims decennis. Necessarias sajan dentant refurmas sin ils divers secturs e ponderaziuns davart ina midada da la situaziun conjuncturala, ha punctuà *Urs Schwaller*, cusseglier dals chantuns (pcd/FR).

### Dismetter malgistadads

La Partida cristiandemocratica svizra (pcd) vul procurar che las dumondas da l'AVS vegnian suenter 16 onns da silenzi puspè sin l'agenda politica, ha ditg Schwaller. Sin divers secturs sajan refurmas urgentas. Cun ina iniziativa dal pievel vul la pcd dismetter la malgistadad da dretg sin renta tranter pèrs maridads e tals che vivan ensemen senza attest da

matrimoni. Tgi che è maridà retschaiva oz mo ina renta e mesa (150%), empè da duas rentas entiras. Questa correctura custass tranter 1,7 e 2 milliardas francs. Persuenter duain personas maridadas che na tgiràn betg uffants e senza entradas da gudogn pajar almain ina contribuziun minimala a l'AVS. Quai purtass la summa da 300 milliuns francs l'onn en cassa.

En il senn constituziunal d'egalitad saja plinavant da procurar per ils medems dretgs tranter umens e dunnas. Lezzas retiran la renta da l'AVS cun 64 onns. La pcd pretenda ils medems dretgs per tuts e propona da flexibilisar la vegliadetgna da renta tranter 60 e 70 onns. Plinavant pudessan ins far tschertas reduziuns tar ils supplements dubels per ils uffants, saja quai cun reducir il supplement per uffants da personas invalidas da 40% sin 30% u da stritgar il dubel supplement en cas nua che la lescha preveda oz dus supplements per uffants. In en cas d'activitad professiunala e l'auter per il segund genitur che retila l'AVS sin fundament da sia vegliadetgna. Humbel ha er fatg attent sin l'augment massiv tar las prestaziuns supplementaras (Ergänzungsleistungen). Quellas èn s'augmentadas ils ultims onns da trais sin quatter milliardas francs. Tenor Humbel duess vegnir dismess la pussaivladad da retrair

il chapital or da la cassa da pensiun (segunda pitga) ed en cas da miseria preten-der agid social.

### Solidaritad dals fitg bainstants

Per contribuir a la segirezza da las rentas en l'avegnir metta la pcd en discussiun ina contribuziun da solidaritad dals pensiunads fitg bainstants. Tenor Schwaller èn var 14% dals pensiunads fitg bainstants e disponan d'ina facultad da quatter fin tschintg milliuns francs u dapli. Concret pudessan quests pajar ina contribuziun da solidaritad da 5% che fiss limitada sin maximum 23 000 francs. Quai purtass a l'AVS var 150 milliuns francs l'onn.

### Prevegnir

Necessari saja da fa ponderaziuns en cas d'ina midada conjuncturala. Duess il fondo der segirtad da l'AVS – che duai corresponder a las rentas dad in onn (var 30 mia.) sa reducir sin 70% u damain, stuess il parlament reagir e decretar las mesiras necessarias. La pcd propona in augment da las contribuziuns u in auzament da la vegliadetgna da pensiun. Schwaller crititgescha tschertas tendenzas d'interpresas che hajan creà agens fondos socials per evitar contribuziuns a l'AVS. In tal diever abusiv stoppia vegnir dismess.